

古刻叢鈔

賢



重校本

古刻林叢鈔

欽定四庫全書提要

古刻叢鈔一卷

明陶宗儀編宗儀有國風尊經已著錄是編前後  
無序跋所鈔碑刻凡七十一種漢一後漢二晉一  
宋三梁三隋二唐四十九南唐一北宋二南宋一  
無年月者六皆全錄其文以原額爲題無所考辨  
亦無先後次序蓋隨得隨鈔非著書也然所載諸  
碑傳於世者甚罕惟漢建平郾縣刻石見於隸續  
漢隸字源唐薛王府典軍李無慮墓誌見於金石



錄其餘如宋之臨澧侯劉襲墓誌梁之永陽敬太妃王氏墓誌唐之汝南公主墓誌蔚州刺史馬紆墓誌多與史傳相發明又載唐人曹汾等別東林寺徐浩題寶林寺及謁禹廟釋元孚與王謩遊天台詩共七首亦自來錄唐詩者所未及古人著作託金石以垂於後然金石有時而銷泐其幸而存者不貴存曰貴錄其文而後可傳於無窮故洪适隸釋隸續較金石集古諸錄更爲有資於考證是書撫拾佚文首尾完具非惟補金石家之闕漏卽

讀史談藝亦均爲有所裨矣

古刻叢鈔

玉霄真逸陶宗儀

大唐故陪戎校尉崔府君墓誌銘

并序

君諱相清河人也神農之苗胄太公之允緒原夫魚吞  
呂釣應同載以歸周龍躍崔津表嘉名以誕慶曾祖瓌  
隨任鄭州司馬祖罔父觀隨任豪州錄事參軍或六條  
布政揚至德以宣風或千里輔仁翊公平以闡化君高  
門華緒閎氣清姿椅桐吸日月之光松柏挺風霜之節  
方冀南山錫壽永駐頽齡北帝遊魂先悲過隙嗚呼哀



哉以開元十年二月廿一日終於私第春秋六十有八  
夫人丁氏蘇氏李氏並母儀婉順婦德惠和移鄰之慶  
早彰舉案之驩夙備庶期千月壽保百齡冀椿鶴而齊  
年奄菌蟠而等謝越開元十年三月八日合祔於村西  
北二里平原禮也左榮澤右成皋峨峨飛嶠鎮其前滔  
滔黃河灌其後嗟乎玉樹雙埋金聲兩絕白日杳而三  
千歲黃泉深而幾萬重悲風起而松柏哀淒露泣而蓬  
蒿泣嗣子待賓等瞻天靡訴扣地無追長縈銜索之悲  
永結殮茶之苦銘曰



東光不駐西影彌催崑山玉碎蘭苑香摧元宵易掩白日難開母儀夙備婦德早彰匣中劒折鏡裏鸞亾乾坤載合琴瑟重張森森翠柏騷騷白楊千秋播馥萬代流芳

大唐故忠武將軍行薛王府典軍上柱國平棘

縣開國男李府君墓誌銘

并序

工部員外郎賈彥璿撰

君諱無慮字忠脊隴西人也昔月貫于昴咎繇誕而邁德氣感流星伯陽生而啓聖惟彼降瑞因茲命氏曾祖

貴隨大中大夫延州刺史涼國公皇降封隴西公任切  
分憂寵加勞理朱旗映日阜蓋生風屬隨室道喪我唐  
天啓疇庸錫壤俾崇舊勲封以隴西昭其業也祖斌皇  
銀青光祿大夫隰吉二州刺史襲封隴西公□□高□  
御下以寬洗憤清心不言而理襲封本郡昭其祚也父  
□道皇金紫光祿大夫汾州刺史股肱之郡公輔之材  
克著政□尤□人望遷鎮軍大將軍左驍衛大將軍上  
柱國襲封隴西郡公武庫森森縱橫矛戟智囊□□□  
□風雲煥乎鉤陳設在蘭綺乃祖乃父自公自侯昭其

貴也君衣冠奕世禮樂□賢慶藹炳靈光昭茂緒大君  
有命入衛天階□□呈祥仲由負三軍之勇□領標  
異班超封萬里之侯弱冠於清邊軍立功授游擊將軍  
左衛長上明略經濟雄心英果剋清祿孽飲至天庭師  
出以臧功宜上賞朱紱斯曜可不偉歟無何轉授鄜州  
葦川府右果毅時關內按察使強仁以君幹蠱奏攝會  
州司馬又改授同州洪泉府左果毅仍令長上一貴一  
賤喜慍不形於色或出或處寵辱無戒於懷位□題輿  
□申龐統名參都尉負屈曾洪有敕差充□野軍副使



舉不失德勤不告勞展充國之務農輟揚雄之執戟軍  
儲是給口馬賴焉尋爲太原節度使李暉奏授薛王府  
典軍蔽扞雄城趨侍口口每入招賢之觀時陪樂口之  
遊習習雄風和而扇物粲粲口口寵而益口青春始華  
元夜闕景歲不我與天奪其運以開口十七年五月七  
日終於靜恭私第春秋六十有二以其年六月十一日  
歸葬於万年縣神禾舊京陪先塋禮也嗚呼哀哉賢王  
端憂故人啜泣垂天之翼必鏤於紫霄經國之材俄辭  
於白日遂使瑤林瓊樹瘞松草於佳城龍章鳳姿沒風



煙於□□嗣子□庭等孝履增感攀號無訴恭陳遺事  
俾刊豐石銘曰

公侯之子兮累代其昌河岳之秀兮爲龍爲光克岐克  
嶷兮發言有章立功立事兮厥政其芳天何爲兮速罹  
其殃哲人痿兮爲代所傷飛旒翩翩兮出帝鄉素車逶  
遲兮面龍岡閉以大隧堊於便房勒勲鍾鼎畫像旗常  
日黯黯兮愁欲暮風蕭蕭兮悲白楊

唐故江南西道觀察判官監察御史裏行太原王

公墓誌銘

并序

表姪前諸道轉運推官將仕郎試大理評事許志雍撰

公諱叔雅字元宏太原祁人也其先食采於祁因邑命氏軒蓋蟬聯奕葉口茂忠貞孝友史不絕書素風懿範繼華紹烈誠有國之柱石爲令族之領袖五代祖祐周驃騎大將軍開府儀同三司光祿卿隋拜司空兼中書令諡曰忠烈忠烈生皇朝比部郎中資州刺史師感公之高祖也資州生朝請大夫澤王府司馬清源縣開國男守節公之曾祖也清源生渝州刺史贈懷州刺史口一公之王父也懷州生金紫光祿大夫試祕書監兼御



史中丞衢州刺史贈揚府大都督諱承俊公之先考也  
以中書之勲烈比部之令望清源之宏茂懷州之懿德  
中丞之雄邁世濟其美慶鍾後昆公卽中丞第四子也  
弱不好弄幼而能文一見不忘有類王充之敏五行俱  
下不慚應奉之才爲善孜孜小心翼翼恭敬以奉上篤  
愛以臨下接士必盡其材脩己不疵於物於是鄉里揖  
其仁朋友伏其義時祕書郎嚴維有盛名於代雖以公  
年幼交契老成若蔡邕才重拔王粲於弱齡李膺望崇  
歎孔融於稚齒嘉其至性敦重機口深邃每器而厚之



時攜幼弟適郢乃賦詩以贈云萬里天連水孤舟弟與  
兄時屬而和者連郡繼邑染簡飛翰晷月不息繇是聲  
華籍甚於公卿閒郡舉進士纔及京師動目屈指傾蓋  
結轍爲禮部侍郎劉太真深見知遇再舉而登甲科浹  
辰之間名振寰宇俄爲山南東道嗣曹王皋辟爲從事  
丁太夫人憂服闋調補左衛率府兵曹參軍環衛望高  
以優賢也未幾爲嶺南連帥韋公丹舉列上介表遷左  
金吾衛兵曹參軍連府才雄軍門瞻重每口徐孺之榻  
獨奪陳琳之筆屬本使節制東川府幙遂散邀公獨行

奏遷廷尉評兼監察御史府公再遷慈晉俄領江西復  
隨鎮拜監察御史裏行以南康缺牧假行刺史事盡閭  
里之情祛疲繭之疾人得歸厚吏不敢欺歲月之閒  
□增□復□臨川□南郡之理仁風所被清議攸彰無  
何寢疾經時沈痼以元和四年正月七日告終於洪州  
南昌縣之官舍春秋五十有五嗚呼哀哉以公之孝可  
以動神明以公之忠可以□社稷以公之德可以反澆  
漓以公之仁可以厚風俗有一於此卽爲全人況其□  
者乎奈何天不與善奪□重器民不幸歟時不幸歟夫